

Morning Dogri (NSD) Bulletin

06-01-2026

आकाशवाणी

खास-खास खबरां:-

- निर्वाचन आयोग उत्तर-प्रदेश च मतदाता सूचियें दी गहरी नज़रसानी मगरा अज्ज मसौदा मतदाता सूचि प्रकाशित करोग।
- केन्द्री मंत्री अमित शाह होर अज्ज नमीं दिल्ली च सी.एस.आर कान्कलेव दा उदघाटन करगंन।
- सुप्रीम कोर्ट नै केन्द्र ते इ.पी.एफ.ओ गी चीं महीने दे अंदर-अंदर इ.पी.एफ.एस वेतन सीमा च तरमीम पर फैसला लैने दे हुक्म जारी कीते न।
- जर्मनी दे चांसलर फ्रेडरिक मर्ज़ 12 जनवरी गी भारत दी पैहली सरकारी यात्रा पर आवा करदे न।
- पी.वी. सिंधु कुआलंपुर च मलेशिया ओपन 2026 च वापसी करने लेई त्यार

<><><><><><>

UP SIR Updated

निर्वाचन आयोग उत्तर-प्रदेश च जारी मतदाता सूचियें दी गहरी नज़रसानी आहली प्रक्रिया मगरा अज्ज मसौदा मतदाता सूची प्रकाशित करोग। ए सूचि पहले 31 दिसम्बर गी प्रकाशित कीती जानी ही। उत्तर-प्रदेश दे मुख निर्वाचन अधिकारी नवदीप रिणवा होरें जानकारी दिती जे दावेदारियें ते एतराजें गी हासल करने दा समां अज्ज 6 जनवरी थमां लेइयै 6 फरवरी 2026 तक्कर रखेया गेदा ऐ। इस दौरान 6 जनवरी थमां 27 फरवरी 2026 तगर दावे ते एतराजें पर फैसले लैते जागंन। उत्तर-प्रदेश दी मतदाता सूचियें दा खीरी प्रकाशन 6 मार्च 2026 गी कीता जाग। उनें दस्सेया जे सब्बै गणना प्रपत्र हासल होई गेदे न ते उंदा डिजिटीकरण कीता जा करदा ऐ।

<><><><><><>

Amit Shah –CSR Conclave

केन्द्री गृह ते सहकारिता मंत्री अमित शाह होर अज्ज नमीं दिल्ली दे विज्ञान भवन च पोषण सुरक्षा ते कुपोषण गी दूर करने सरबंधी कार्पोरिट समाजी जिम्मेदारी दे सिरलेख आहले कार्पोरिट सामाजिक उत्तर-दायित्व सी.एस.आर सम्मेलन दा उदघाटन करगंन। सम्मेलन दा मकसद बच्चें च कुपोषण गी काबु च करने आस्तै आपसी सहयोग पर आधारित नमियें ते सतत रणीतियें पर बचार-वमर्श करना ऐ। कार्यक्रम दा सरिस्ता राष्ट्री डेयरी विकास बोर्ड ए.डी.डी.बी नै कीते दा ऐ। सम्मेलन दौरान श्री शाह होर छतीसगढ़ दे सेल भिलाई स्टील प्लांट दी सी.एस.आर पैहल तैहत गिफ्ट मिल्क कार्यक्रम दे त्रियें गेड़ दा उदघाटन बी करगंन। इस पैहल कन्नै भिलाई स्टील प्लांट दे खनन क्षेत्रें च स्थित सरकारी स्कूलें च पढ़ने आहले तकरीबन 4000 बच्चें गी लाह पुज्जोग।

<><><><><><>

SC EPFO

सुप्रीम कोर्ट नै केन्द्र सरकार ते कर्मचारी भविष्य निधि संगठन इ.पी.एफ.ओ गी कर्मचारी भविष्य निधि योजना तैहत तनखा दी सीमा तरमीम पर चों महीने दे अंदर-अंदर फैसला लैने दे हुकम जारी कीते न। ध्यानजोग ऐ जे पिच्छले 11एं बरे थमां एदे च कोई बदलाव नैई कीता गेदा ऐ। न्यांमूर्ति जे.के. महेश्वरी ते अतुल एस. चंदुरकर हुंदी पीठ नै इक्क जनिहत याचिका पर सुनवाई करदे होई ए निर्देश जारी कीते। याचिका च आखेया गेदा हा जे वेतन सीमा च कोई बदलाव नैई होने करियै मज़दूरें दा इक्क बड़्ठा वर्ग इ.पी.एफ.ओ दे दायरे थमां बाहर रेई गेदा ऐ।

<><><><><><>

Dr. S. Jaishankar Paris

बदेश मंत्री डाक्टर एस. जयशंकर होर अज्ज फ्रांस दे दौरें पर न। सोशल मीडिया दी इक पोस्ट च डाक्टर एस. जयशंकर होरें दस्सेया ऐ जे उनें फ्रांस च इक प्रदर्शनी दा दौरा कीता। उनें आखेया जे एह प्रदर्शनी भारत दी कपड़ा विरासत- कौशल ते रचनात्मकता गी प्रदर्शित करदी ऐ ते दौनें देशें बश्कार मजबूत सांस्कृतिक सरबंधें गी दर्शादी ऐ। अपनी यात्रा दरान डाक्टर एस.जयशंकर होर पेरिस च फ्रांस दे नेताएं कन्नै मलाटी करगंन।

<><><><><><>

MEA -Iran

विदेश मंत्रालय नै इक यात्रा दिशा-निर्देश जारी करिए भारतीय नागरिकें सोयां आग्रह कीता ऐ जे ओह हाल दे घटनाक्रम गी दिखदे होई अगली सूचना तकर ईरान दी गैर-जरूरी यात्रा सोयां बचन। ईरान च मौजूद भारतीय नागरिकें ते भारतीय मूल दे लोकें गी सावधानी बरतने ते विरोध प्रदर्शनें आहले थाहरें थ्वां दूर रौहने दी सलाह दिती गई ऐ। मंत्रालय नै उनेंगी खबरें दे कन्नो-कन्नी तेहरान स्थित भारतीय दूतावास दी वेबसाइट ते सोशल मीडिया पर भी नजर रखने लेई आक्खेआ ऐ। ईरान च निवास वीजा पर रवा र दे भारतीय नागरिकें गी सलाह दिती गई ऐ जे जेकर उनें अजे तगर पंजीकरण नैई कराया ऐ तां ओह भारतीय दूतावास च पंजीकरण कराई लैन।

<><><><><><>

German Chancellor Visit

जर्मनी दे चांसलर फ्रेडरिक मर्ज़ प्रधानमंत्री नरेन्द्र मोदी हुंदे साददे पर 12 ते 13 जनवरी गी भारत दे दौरै पर आवा करदे न। ए उंदी पैहली सरकारी यात्रा योग। विदेश मंत्रालय नै इक्क ब्यानें च आखेया ऐ जे दौरै दौरान श्री फ्रेडरिक अहमदाबाद ते बेंगलुरु जागंन। प्रधानमंत्री 12 जनवरी गी अहमदाबाद च चांसलर हुंदा सोआगत करगंन। दौनें लीडर भारत-जर्मनी रणनीतिक सांझेदारी दे बक्ख-बक्ख पैहलुएं च होई दी तरक्की दी समीक्षा करगंन- जिनें जंदे बरे 25 साल पूरे कीते न।

<><><><><><>

Maduro –NY Court

वेनेजुएला दे लीडर निकोलस मादुरो नै न्यूयार्क शैहरें दी इक्क संघीय अदालत दी पेशी दौरान नेकां संघीय आरोपें च अपने आपू गी बेकसूर दस्सेया ऐ। न्यूयार्क च अमरीकी संघीय अदालत सामने अपनी पैहली पेशी दौरान मादुरो होरें अपनी गिरफ्तारी दी वैधता पर सोआल पुट्दे होई दावा कीता जे उनेंगी वेनेजुएला दे कराकस स्थित उंदे घरें थमां हिरासतें च लैता गेदा हा। इस ब्यानें थमां शारा थोन्दा ऐ जे उंदी कानूनी बचाव रणनीति दा इक्क मुख आधार ए होग जे विदेशी धरती पर अमरीकी कानून प्रवर्तन एजेंसियें आसेया उंदी गिरफ्तारी इक्क गैर-कानूनी कारवाई ही।

मादुरो दी कानूनी टीमै गिरफ्तारी गी फौजी अगवा दस्सेया ऐ ते तर्क दिता ऐ जे चिरें रातीं दी इस कारवाई च अंतराश्ट्रीय कनूनी प्रक्रिया दे प्रावधानें दी खलाफवर्जी कीती गई ऐ।

<><><><><><>

#### Rainbow Trout

केन्द्री मच्छी पालन- पशुपालन ते डेयरी मंत्री राजीव रंजन सिंह होरें केन्द्री कोयला खान मंत्री जी. किशन रेड्डी हुंदे कन्ने तेलंगाना दे रंगा रेड्डी जिले च देसै दे सब्बनें शा बड्डे इंटीग्रेटड Inland Rainbow ट्राउट फार्म दा उदघाटन कीता। स्मार्ट ग्रीन एक्वा-कल्चर नां दे इक स्टार्ट-अप नै अज्जै-कल्लै दी तकनीक दा इस्तेमाल करियै ठंडे पानी आहली इस मच्छी दे फार्म गी स्थापत कीता ऐ। एदे च अंदाजन 50 करोड़ रुपें दी रास-पूंजी लाई गई ऐ। आम तौरा पर भारत च ट्राउट फार्मिंग हिमाचल दे उप्परले ठंडे पानी आहले इलाकें तग्गर ही सीमित रेई ऐ।

<><><><><><>

#### Ayush Conference

दुबई 15 थमां 17 फरवरी 2026 तगर दुबई वर्ल्ड ट्रेड सैन्टर दे त्रिये अंतराश्ट्रीय आयुष सम्मेलन ते नमैश दी मेज़बानी करोग। एदे च 35 शा बद्ध देसे दियां रिवायती चिकित्सा प्रणालियें दे प्रैकटीशनर शोधकर्ता नीति निर्माता- बंज बपार जगत दे नुमायंदे ते विदार्थी कन्ने आंगन।

<><><><><><>

#### IMD

मौसम विभाग नै अगले 2 शा 3 दिनें लेई बिहार पूर्वी यूपी. ते एम.पी. च बड़े मते घने कोहरे दे हालात लेई ऑरेंज अलर्ट जारी कीता ऐ। पंजाब- चंडीगढ़ ते हरियाणा च बी इये नेह हालात बने रौहने दी संभावना ऐ। मैहकमे मताबक शुक्रवार तग्गर हिमाचल-प्रदेश-उत्तराखंड- राजस्थान- पश्चिमी उत्तर-प्रदेश- बिहार- छत्तीसगढ़- ओडीशा- उप-हिमाचलयी पश्चिमी बंगाल ते उत्तर पूर्वी राज्यें च घने कोहरें दी स्थिति रौहग।

<><><><><><>

Malaysia Open 2026

बैडमिंटन च दंडु बारी ओलम्पिकि च तगमा जितने आहली पी.वी. सिंधू अज्ज कुआलालंपुर दे स्टेडियम एकिसयाटा एरीना च आयोजित कीते गेदे मलेशिया ओपन 2026 बैडमिंटन टूर्नामेंट खेडोग। सीज़न दा ए पैहला टूर्नामेंट सिंधु ताई चोटें थमे प्रभावत 2025 अभियान मगरा इक्क नमीं शुरुआत दा प्रतीक होग महिला सिंगल्स च मालविका बंसोद ते उन्नति हुड्डा बी नज़र आँगन। मर्दे दे सिंगल्स च लक्ष्य सेन ते आयुष शेट्टी हिस्सा लै करदे न- जेल्ले के डबल्स च चिराग शेट्टी ते सात्विक साई राज रंकी रेड्डी भारत पासेया मजबूत दावा पेश करगंन।

<><><><><><>

Cricket

बेनोनी च भारत नै दक्खण अफ्रीका गी दूए अंडर-19 इक रोजा क्रिकेट मुकाबले च 8 विकेट कन्नै हराई दिता ऐ। दक्खन अफ्रीका नै पैहले बल्लेबाजी करदे होई भारत गी 246 रन दा लक्ष्य दिता ऐ। खराब मौसम करी मुकाबले गी 27 ओवर दा करी दिता गया। डकवर्थ लुईस नियम दे आधार पर भारत गी इक सौ 74 रन दा लक्ष्य दिता गया हा। पैहले बल्लेबाजी करदे होई दक्खन अफ्रीका दी टीम नै रन बनाए ते ओदे सारे खडारी आऊट होई गए हे। 245 गेदें च 3 ओवर ते 49

<><><><><><>

Atiqa Mir Karting Championship

जम्मू-कश्मीर दे श्रीनगर दी 11एं बरें दी कार्टिंग रेसर अतिका मीर नै मिनी वर्ग (8 शा 12 बरे दे वर्ग) थमां जूनियर S 125 वर्ग (12 शा 14 बरे आहले वर्ग) च शानदार प्रदर्शन करदे होई अबुधाबी दे फार्मूला 1 ट्रैक पर IAME UAE कार्टिंग चैम्पियनशीप दे 7में राउंड दौरान दुनिया भरै च शीर्ष 5 च जगह हासल करने आहली पैहली भारतीय बनी गई ऐ। एह प्रतियोगिता अबुधाबी दे फॉर्मूला 1 ट्रैक यास मरीना सर्किट च आयोजित कीती गेदी ऐ। पुरुष प्रधान लाइनअप च 35एं ड्राइवरें च पंजमी थाहरै पर रौहने कन्नै अतिका IAME UAE चैम्पियनशिप दे इतिहास च शीर्ष 5 फिनिश हासल करने आहली पैहली महिला बी बनी गई ऐ।

IAME UAE कार्टिंग चैम्पियनशिप संयुक्त अरब अमीरात च इक प्रमुख पेशेवर कार्ट रेसिंग श्रृंखला ऐ- जेहड़ी बक्ख-बक्ख बरेसु दे समूहें च उच्च प्रदर्शन आहले IAME एक्स 30 इंजनै कन्नै मकाबला करने आहले युवा प्रतिभाएं गी इक मंच प्रदान करदी ऐ।

<><><><><><>

Jammu Rly Div.-Ist Year

पिच्छले बरे 6 जनवरी गी जम्मू डिविजन गी भारत दे 70में रेलेवे डिविजन दे तौर पर कायम कीता गया। इसदा लगभग इक बरा पूरा होई गेआ ऐ। इस इक बरे च इसने केई ऐतिहासिक ते टकोहदियां उपलब्धियां हासल कीतियां न। इसदा उदघाटन प्रधानमंत्री नरेन्द्र मोदी होरें कीता हा। जम्मू रेलवे डिविजन नै ढांचे-राबते ते पूरे-पराते कारवाइयें आहले सरिस्ते सने केई संगेमील हासल कीते न। इंदे च उधमपुर-श्रीनगर -बारामुला रेल लिंक दा चालू होना- चनाव ते अंजी पुल दा शुरु होना -वंदे भारत एक्सप्रेस सेवा दा शुरु होना शामिल ऐ- जेदे कन्नै सैलसफा च बाददा होआ ऐ ते चीजे बस्ते दी ढोआई बी सौक्खी होई ऐ।

<><><><><><>